

Date – 17/10/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Chief Minister Pu Lalduhoman kumin September ni 1 atanga tuialhthei man tihsan chu tih danglam a ni lova, a ngai anga hman zui tur a ni a ti.
2. Chief Minister Pu Lalduhoma chuan Lengpui Airport, Indian Air Force kuta pek chungchangah thutlukna an la siam lo tih a sawi.
3. BJP hruaitu Nayab Singh Saini chu Haryana Chief Minister atan a term hnih nan vawiin khan rinawmna thu tiam tira lakluh a ni.
4. Africa ram pathum tlawh tura zin President Draupadi Murmu-i chuan vawiin khan a tawp ber atan Malawi a thleng.

<><><>

CM

Chief Minister Pu Lalduhoman kumin September ni 1 atanga tuialhthei man tihsan chu tih danglam a ni lova, a ngai anga hman zui tur a ni a ti.

Nimin khan a kaihhruaia Council of Ministers thukhawmin petrol leh diesel man chungchang hi an ngaihtuah a, Chief Minister chuan tuialhthei man chungchang chu an vawithum ngaihtuahna anih tawh thu sawiin diesel chu VAT zaa 10-a tihsan a nih thu leh social infrastructure and services cess leh road maintenance cess cheng 2 ve ve lain tihian a hmaa cheng 80 leh pawisa 30 man chu cheng 87 pawisa 99 ah a chho ta a ti a, a punna chu cheng 7 leh pawisa 69 a ni a. Covid hri len hmain diesel man chu cheng 86 leh pawisa 37 a ni a, chumi aia tuna a man sanna chu litre khatah cheng 1 leh pawisa 62 chauh a ni a, a pung nasa lo a ni a ti.

Chief Minister chuan chhiah punna chhan chu mipuiten hria se a duh thu sawiin cess an lakna chu social infrastructure and services cess leh road maintenance cess a ni a. Social infrastructure and services cess chu thil pawimawh hrang hrang school tihchangtlunna turin zaa 25, hriselna leh damdawiin tihchangtlun nan zaa 25, thalai te tan skill development-ah zaa 25 leh a dang zaa 25 chu hmeichhia te chawikhanna pual project hrang hranga hman tur a nih dawn thu leh, a hlawkna teltu chu mipuite vek an nih dawn thu a sawi a. Cess dang, Road maintenance cess chu kawng enkawlina liau liau a hman tur a nih thu a sawi a. Sorkarin a tul ti a, mipuite tana hamthatna tur zawk a ni tia ruahmanna a siam chu mipui zawng zawng, pawl zawng zawngin pawmpui thei se tih an duh dan leh an ngenna a nih thu a sawi a ni.

ZPM in chhiah an tipung dawn lo ti a sawi anga an thang chu, anmahni puhchhiatna mai a ni tih Chief Minister hian a sawi bawk a, tawngkamin emaw ziakin chhiah pun loh tur thu hi an dah lo a ti a, chhiah pun loh tur an sawi chhun chu electric bill a ni a, hei erawh tihpun an tumlo a ti.

Hetihlai hian sorkar thutlukna ngaichang mektu NGO Coordination Committee leh Mizoram Commercial Vehicle Union hruaitute chuan sorkar thuchhuak hi ngaihtuahin an thukhawm ve leh dawn tih kan corr zawhna chhangin an sawi a ni.

Tuialhthei man sang duhlohna lantira, tihniam tura nawrtu Mizoram Commercial Vehicle Union hruaitute chuan NGO Coordination Committee in tuialhthei man tihniam tura an nawr ve tho avangin anmahni ngaichang tura an tih thu an sawi a. Hetianga sorkar thuchhuak a awm takah hian NGOCC te nena an la thutkhawm leh an beisei thu leh an thutkhawm hunah an kal zel dan tur chu an rel dawn thu an sawi a ni.

MCVU hruaitute chuan a bik takin, lirthei lian, truck te tana harsatna a len bik thu sawiin commercial vehicle dangte chuan STA dila an tlan man san mai thei an nih lain truck te chuan FCI leh Food, Civil Supplies & Consumer Affairs -ah hun bi neia inremna lo ziak lawk vek tawh an ni a. An inremna chu tuialhthei man san hma rate mil vek a nih avangin truck neitu bik tan a harsa zual bik a ni an ti.

<><><>

CM

Chief Minister Pu Lalduhoma chuan Lengpui Airport, Indian Air Force (IAF) kuta pek chungchangah thutlukna an la siam lo tih a sawi a.

Nimin khan Chief Minister Pu Lalduhoma kaihhruai Council of Ministers thutkhawm neih a ni a, heta an thurel chungchang sawiin Chief Minister chuan state sorkarin Lengpui Airport a enkawl zel dawn chuan sum senna tur sang tak tak runway thawm that bakah a sira runway dang siam belh, Instrument Landing System thawmthat leh adangte chu thil hautak tak a nih thu a sawi a. Air Force kuta hlan a nih erawh chuan an niin an siam vek thei dawn a ti.

Indian Airforce duhdan chuan ram chin insemin a runway lehlam zawng an chang anga, a siamthat leh thawmthat ngai zawng zawng an sumin an thawk ang a, hlawkna erawh Mizoram sorkarin a chang ve ang a ti. Mipuite tana tha tur school tha leh damdawiin tha bakah staff quarter te Indian Airforce chuan an sak tel dawn thu Chief Minister chuan a sawi a. A bak terminal awmna chu sorkarin a la chang zui dawn tih sawiin operation a ngai angin a kal ang a, state sorkarin hlep a nei zel tawh dawn thung a ni a ti.

Chief Minister chuan Mizoram aia hausa state dangte pawhin an tih ngam loh, state sorkarin airport a enkawl chu Mizoramin a zo ngang lo a ni a ti a. Sorkar hmasa te pawn hei hi hriain a dehral dan kawng an zawng a, an hmalakna chu chumi chhunzawmna mai chu a ni a ti a. Working Committee atanga report chu Council of Ministers thukhawmin an lo pawm phawt a, Indian Airforce nen lo indawr zui phawt se an tih thu a sawi a. Indian Airforce kuta hlan leh hlan loh tur erawh cabinet in a tawpah report an hmuh azirin thutlukna an siam ang a ti.

<><><>

TOBACCO FREE YOUTH CAMPAIGN

Mizorama district hrang hrangah vawiin khan Tobacco Free Youth Campaign 2.0 huaihawt a ni.

Lungleiah "Tobacco Free Youth Campaign 2.0" chu Convention Centre-ah Additional Deputy Commissioner Pu James Miahlung chuan a hawng a. Pu James Miahlung chuan zuk leh hmuama fihlim tura beihpui thlak tur chu hriselna khawih thil a nih avangin a pawimawh hle tih sawiin, kal khawmte chu a tihlawhtlingtu nih tum theuh turin a chah a ni. Campaign hawnaah hian higher secondary school zirlaite bakah, sawm bik sawrkar official thenkhatte an tel a. Hawna inkhawm hman zawhah Convention Centre atanga Old Tennis Court thlengin kawng an zawh zui a ni.

Serchhipah pawh Tobacco free youth campaign 2.0 chu Bawrsap Pu Paul L Khuman a hawng a. Bawrsap chuan mihring taksa chu vaihlo ur tura duan a ni lo tih sawiin kum khatah India ramah mi nuai 13, Mizoram mipui aia tam vaihlo in a suat a, ngaihtuah ngun a ngai hle a ni a ti. Serchhipa Tobacco free youth campaign 2.0 hawnaah hian, NTCP councillor Maria VL Neihhlui kaihhruaiin vaihlo a fihlim turin thu tiam lak a ni a. Police, Govt PCR High school zirlaite, Tlawmngai pawl MUP, MHIP leh YMA te bakah MJA aiawh te hawnaah inkhawmah hian an tel a ni.

Lawngtlaiah chuan National Tobacco Control Programme (NTCP) Lawngtlai District bultumin "Tobacco Free Youth Campaign 2.0" chu DC Conference Hall-ah hawn a ni a. Bawrsap Pu Cheemala Siva Gopal Reddy, District Level Coordination Committee on Tobacco Control nibawk chuan campaign hi a hawng a. Bawrsap chuan Lawngtlai District mipuite vaihlo, zuk leh hmuam laka an lo fihlim theihna turin 'Tobacco Free Youth Campaign 2.0' chu tangkai taka hmang turin a chah a. Indian Council of Medical Research (ICMR) tarlan danin Mizorama cheng za zela 77 te chu zuk leh hmuam ti mi an ni tih a sawi a. Mizoram chu Cancer khawpui tih hial a ni tih sawiin, hei hi thil lungchhiatthlak tak a ni, a ti. District Level Coordination Committee on Tobacco Control thukhawm chuan Chawnhu khua chu Tobacco Free Village-ah vawiin khan an puang nghal bawk a ni.

<><><>

MIZORAM LITERATURE FESTIVAL

Ni hnih aw h tur Mizoram Literature Festival chu vawiin khan Aijal Club, Aizawlah tan a ni.

Mizoram Literature Festival Organising Chairman Pu Vanlalruata Ralte chuan Akashvani palai zawhna chhangin Mizoram Literature Festival chu a tum khatna a nih thu leh The Book Cafe, Aizawl leh Sahitya Academy tangkawp buatsaih a nih thu a sawi a. Pu Vanlalruata Ralte chuan India

ramchhungah tawng avangin mihring an inthen hrang nasa hle tih sawiin chu inthenhranna, diversity chu mipuite thenhrangtu ni lo a, literature hmanga pawtkhawmtu a nih zawkna turin an duh thu a sawi a. Social media in zawimuangin ziak leh chhiar a rawn luahlan chho avangin lehkhabu chhiar lama phurna thar tuh an tum thu a sawi bawk a ni.

Mizoram Literature Festival huaihawt a nih theihna tura mi pawimawh hrang hrang hnenah lawmthu sawiin Pu Vanlalruata Ralte chuan Mizoram Literature Festival chuan nghawng tha tak nei se duh thu a sawi a. Zirlai tam tak, ti ve mai mai thin ten literature chu tuichilh tak tak se a duh thu sawiin literature chu ram hruaitu tha, mi fing siamtu a nih thu a sawi a. Ziakmi mai bakah lehkhabu chhiar thin lo pung se, mipuiten tan la thar leh se tih chu an duh ber a nih thu a sawi a ni.

Mizoram Literature Festival-ah hian ziaktu hrang hrang - Prof Joy LK Pachuau Jerry Pinto, Shinie Antony, Sanjoy Hazarika leh midangte an lokal a. India rama Dominican Republic Ambassador HE David Piug a tel A, Mizoram Literature Festival hawngtu tura beisei Chief Minister Pu Lalduhoma chu a remchan loh avangin a tel lo a ni.

<><><>

HARYANA CM

BJP hruaitu Nayab Singh Saini chu Haryana Chief Minister atan a term hnih nan vawiin khan rinawmna thu tiam tira lakluh a ni.

(Audio)

Haryana Governor Bandaru Dattatreya Chief Minister hi rinawmna thu tiam tirin a lalut a ni. Panchkula-a Shalimar Ground ah lakluh inkhawm buatsaihah hian Prime Minister Narendra Modia pawh a tel a. Pu Saini rual hian MLA 13 te Minister turin lakluh tel an ni bawk a ni.

Vawiin lakluh inkhawmah hian Prime Minister Modia bakah hian Union Ministers Rajnath Singh, Amit Shah, Nitin Gadkari, Manohar Lal, Lallan Singh, Assam Chief Minister Hemant Biswa Sharma, Gujarat Chief Minister Bhupendra Patel, Maharashtra Chief Minister Eknath Shinde, Uttar Pradesh Chief Minister Yogi Adityanath, BJP leaders Devendra Fadnavis, Ram Mohan Yadav leh NDA hruaitu thahnem tak an tel a ni.

<><><>

PRESIDENT

Africa ram pathum tlawh tura zin President Draupadi Murmu-i chuan vawiin khan a tawp ber atan Malawi a thleng a. India President zinga Malawi tlawh hmasa ber a ni a. Ropui taka lo hmuah a ni. Malawi-a a cham chhungin sawrkar mi pawimawh tak takte nen an inkawm bakah India mi chengte nen hun an hmang dawn niin kan Correspondent chuan a sawi.

<><><>

CITIZENSHIP

Supreme Court chuan Assam-a pemit ten India khua leh tui nihna an neih theih dan kaihnawihah Citizenship Act,1955 Section 6A chu a nung tiin thutlukna a siam. Judge panga awmna bench chuan he thu hi ngaihtuahin Chief Justice of India Justice DY Chandrachud chuan Assam Accord chu dan

kalha pmlutte avanga harsatna chinfelna tura siam a ni a ti. Justice Surya Kant, M M Sundresh leh Manoj Misra te chuan he thutlukna hi siamin Parliament chu he dan ken telte siamtha thei turin thuneihna neitu a ni a ti a. Section 6A hi Assam Accord siam anih hnuah kum 1985 khan dah belh a ni a. Kum 1966, January ni 1 hma lama Bangladesh atanga Assama pmlutten khua leh tui nihna pek theihna dan a ni.

<><><>